



8. juni 2026

UPA2026/87

Kalaallit Nunaanni Namminersorneq pillugu inatsit naapertorlugu, Kalaallit Nunaannut imminut naalagaaffittut oqartussaaffigilernissaanut isumaqatigiissut qaqugu, Inatsisartut akuersissuteqarnissaat siunertaralugu Inatsisartunut agguaanneqartussat saqqummiussaqaarnissaanut, piffissaritinneqartussamut missiliuteqarnissamut Naalakkersuisut peqquneqarnissaat Inatsisartut aalajangiiffigisassaattut siunnersuut.

(Inatsisartunut ilaasortaq Pele Broberg, Naleraq)

Siullermik siunnersuuteqartoq, Inatsisartut ilaasortaat Pele Broberg, Naleraq saqqummiussaanut qujavugut.

Siumumiit erseqqissaatigissavarput Kalaallit Nunaata nammineerluni aalajangiisinnaanerata annertusarneqarnissaa aammalu siunissami namminiilivinnissaa Siumup anguniagarimmagu. Kalaallit inuiaat namminneq siunissartik pillugu aalajangiisinnaatitaapput, aammalu Kalaallit Nunaata naalagaaffinngornissaanut tunngatillugu ineriartorneq inuiaqatigiittut pingaarnerpaat ilaanniippoq.

Siunnersuuteqartup kissaatigaa Naalakkersuisut peqquneqassasut Kalaallit Nunaata nunarsuarmi oqartussaaneermik tiguserneranut isumaqatigiissutissap Inatsisartunut saqqummiunneqarsinnaaneranut missingiutaasumik piffissaliinermik saqqummiussissasut.

Siumumiit siunnersuummi siunertaq paasilluarparput. Politikikkut anguniagaq pingaarutilik pineqartillugu pissusissamisoorpoq ingerlaqqiffissamut, ersarissumik paasissutissiinnissamut aammalu innuttaasut naatsorsuutaat pillugit paasinarsaanissamut piumasaqaateqartoqarnissaa. Taamaattumik aamma isumaqarpugut siunnersuuteqartup apeqqut pingaarutilik qaqqikkaa. Kisianni Naalagaaffinngornissap tungaanut ingerlatsineq nalinginnaasumik sanaartornermut suliniutinut sanilliunneqarsinnaanngilaq. Nunarsuarmi oqartussaaneerup tiginissaa, naalagaaffinngorneq, nunat tamalaat akornanni akuerineqarneq, illersornissaqarfik, nunanut allanut politikikkut ingerlatsineq, aningaasaqarnikkut imminut napatissinnaassuseq kiisalu innuttaasut pisinnaatitaaffii pillugit apeqqutit oqartussaaffiillu, sanaartornermi suliniutinut angisuunut sanilliunneqarsinnaanngillat. Oqartussaaffinnik tigusinissat aammalu Naalagaaffinngorniarnermi suliniutit pingaarutilerujussuit pilersaaruserneqarneqartarneri annertunerujussuarmik peqqissaartumik suliassaasarpud aammalu sapinngisamik avissaartuuffiunngitsumik qulequttanillu piginnittuuniuuffigissallugit imaluunniit ajugaaniuffittut pisassaannngimmata, illuanili annertunerpaamik ataatsimoorfissarsiorfissaallutik.

Peqatigisaanilli pingaaruteqarpoq anguniagaq pingaarutilik aammalu qanoq tamatumap angunissaanut aqqutissat immikkoorteqqissaassallugit. Kalaallit Nunaata siunissaa Kalaallit namminneq aalajangissagaat amerlanerussuteqarluartut akornanni isumaqatigiissutaavoq. Kisiannili qanoq sukkatigisumik, qanoq tullerriaartumik aammalu qanoq iliuseqarnikkut anguniagaq anguneqassanersoq pillugu assigiinngissuteqarsinnaavoq.

Namminersorlutik Oqartussat pillugit inatsimmi § 21 naapertorlugu ingerlatsineq arlalinnik pingaarutilinnik immikkoortortaqarpoq. Siullermik Naalakkersuisut aammalu danskit naalakkersuisui



akornanni isumaqatigiissusiortoqassaaq. Tamatuma kingorna Inatsisartut isumaqatigiissummut isummissapput. Tamatuma kingorna kalaallit akornanni innuttaasut taasisinneqassapput, kingornalu Folketingip akuersissuteqarnera pisariaqassalluni.

Taamaattumik inatsisitigut politikikkullu ingerlatsineq annertoq pineqarpoq, innuttaasut, Inatsisartut, Naalakkersuisut aammalu Danmarkimi oqartussaasut peqataaffigisaat. Taamaattumik Siumumiit isumaqarpugut maannangaaq aalajangersimasumik piffissaliinissaq ajornakusoorpoq, isumaqatigiisut qaqugu Inatsisartunut saqqummiunneqarsinnaassanersoq pillugu.

Peqatigisaanillu maluginiarparput Inatsisartut § 21 pillugu Ataatsimiititaliamut suliaata ingerlaqqinnissaa aalajangiutereerpaat. Ataatsimiititaliillu taassumap suliassaata ilaatigut ilagivaa Kalaallit Nunaata nammineernerulernissaanut aammalu Naalagaaffinngornissamut/Namminiilivinnissamut tunngatillugu inatsisitigut, aningaasaqarnikkut, nunat tamalaat akornanni aammalu inuit pisinnaatitaaffiunut tunngasut misissoqjissarlugit nassuiaateqarfigissallugit. Tassa UPA2024-imi immikkoortoq 75-ip aaliangiiffigineqarnerata malitsigisaanik nassuiaammik saqqummersitsisoqarnikuuvoq. Taassumallu malitsigisaanik suliniut pingaarutilerujussuaq qulaani taakkartoriikkagut aallaavigalugit ukiuni tullerni marlunni ingerlassasq Inatsisartut amerlarussuteqartut aaliangernikuullugu. Siumumiillu naatsorsuutillunnarparput suliaq taanna piffissami tullermi Inatsisartunut saqqummiunneqarnissaa Naalakkersuisut naammassissagaat – tassa ukioq manna.

Tamatuma saniatigut Demokraatit, Inuit Ataqatigiit, Siumut aammalu Atassut akornanni naalakkersuisooqatigiinnissamik isumaqatigiissummi isumaqatigiisutigineqarpoq Kalaallit Nunaata siunissaa akisussaassuseqartumik, namminerisamik atugassaqartitsinikkut aammalu innuttaasut peqataatillugit sularineqassasq. Taamaattumik Naalakkersuisooqatigiit § 21 pillugu Namminersorneq pillugu ataatsimiititaliap suliaa aalajangiinissanut tulliuttunut tunngavissatut pingaaruteqartutut isigaat akissutaani atuarsinnaavarput. Siumumiit Naalakkersuisut naliliinerat sammivimmut allaanerusumut akissutaasutut isumaqarnarpoq. Unami qulequtaq allaaneruvoq, qulaanilu taakkartukkaniit allaanerulluni.

Siumumiit isumaqanngilagut siunnersuuteqartup erseqqinnerusumik ingerlatsinissamut kissaataa taamak toqqaannartigisumik itigartinneqassasq. Akerlianilli isumaqarpugut ingerlatsinermi periarfissat assigiinngitsut, pingaarutilinnik killiffiit aammalu piffissamut tunngatillugu periarfissat pillugit saqqummiussisoqarnissaa pisariaqaraluartoq.

Taamaattumik Siumumiit siunnersuummi siunertaq itigartikkusunngilarput. Kissaatigaarpulli siunertaq Inatsisartut aalajangereersimasaat ilanngullugit sukumiisumik nalilersorluarlugu ataatsimiisitaliami sammineqartariaqartut.

Taamatut oqaaseqarluta Siumumiit siunnersuut Inatsisinut ataatsimiisitaliamut ingerlateqqinnissaanut innersuussutigaarput.

Erik Jensen, Siumut